

Na osnovu člana 69. stav (2) tačka d) Zakona o javnim nabavkama („Službeni glasnik BiH”, broj 39/14), Vlada Bosansko-podrinjskog kantona Goražde, na 90. redovnoj sjednici, održanoj dana 27.01.2017.godine, **d o n o s i:**

O D L U K U

o poništenju postupka javne nabavke autodijelova za potrebe voznog parka u vlasništvu institucija Bosansko-podrinjskog kantona Goražde

Član 1.

Poništava se postupak javne nabavke autodijelova za potrebe voznog parka u vlasništvu institucija Bosansko-podrinjskog kantona Goražde, jer nijedna od primljenih ponuda nije prihvatljiva.

Član 2.

Odluka stupa na snagu danom donošenja i objaviće se na web-stranici Vlade Bosansko-podrinjskog kantona Goražde, uz istovremeno upućivanje svim ponuđačima koji su učestvovali u predmetnom postupku javne nabavke, a naknadno će se objaviti i u „Službenim novinama Bosansko-podrinjskog kantona Goražde“.

O b r a z l o ž e n j e

Predmetni postupak nabavke pokrenut je Odlukom Vlade Bosansko-podrinjskog kantona Goražde o ponovnom pokretanju postupka javnih nabavki, br.03-14-1151/16 od 14.07.2016.godine i br.03-14-1469/16 od 09.09.2016.godine.

Procijenjena vrijednost nabavke iznosila je 90.000,00 KM.

Javna nabavka provedena je putem otvorenog postupka.

Obavještenje o nabavci, br.978-1-1-4-3-15/16 poslano je na objavu dana 06.10.2016.godine, te je istog dana i objavljeno na Portalu javnih nabavki.

Sažetak Obavještenja o nabavci objavljen je u „Službenom glasniku BiH”, br.77/16 od 14.10.2016.godine.

Komisija za provođenje postupka zajedničke javne nabavke u Bosansko-podrinjskom kantonu Goražde, imenovana Rješenjem br.03-14-90/15 od 22.01.2015.godine, (u nastavku: Komisija) je u svom Izvještaju o radu, br.03-14-1151-81/16 od 05.12.2016.godine, utvrdila sljedeće:

- da su po objavi odgovarajućeg obavještenja o nabavci blagovremeno pristigle 4 /četiri/ ponude sljedećih ponuđača: „DAMIR COMPANY“ d.o.o. GORAŽDE, „PAUK-PROM“ d.o.o. GORAŽDE, „MAP-AUTO“ d.o.o. GORAŽDE, i „APOLLO“ d.o.o. GORAŽDE.
- da ponuda ponuđača „DAMIR COMPANY“ d.o.o. GORAŽDE nije prihvatljiva zbog neispunjavanja uslova za kvalifikaciju jer je imenovani ponuđač uz svoju ponudu propustio dostaviti potvrde svih poslovnih banaka (“BBI bank” d.d.) kod kojih ima aktivne račune i koji se nalaze na Izvještaju Centralne banke o računima pravnog lica da mu transakcijski račun nije u blokadi, a što je izričito traženo tačkom 3.3.2 Tenderske dokumentacije, br.03-14-1151-35/16 iz oktobra 2016.godine. Na ovaj način, imenovani ponuđač nije u potpunosti ispoštovao citiranu odredbu Tenderske dokumentacije i

onemogućio je ovaj ugovorni organ da izvrši sveobuhvatnu provjeru činjeničnog stanja u pogledu njegove ekonomsko-finansijske sposobnosti;

- da ponuda ponuđača „PAUK-PROM“ d.o.o. GORAŽDE nije prihvatljiva jer je umjesto tačkom 3.3.2 Tenderske dokumentacije traženog dokaza vezano za potvrde banaka da mu transakcijski računi u poslovnim bankama nisu u blokadi i izvještaj Centralne banke BiH o računima pravne osobe, uz potvrdu jedne poslovne banke priložio izvještaj Centralne banke o istoriji statusa računa koji ponuđač ima otvoren kod te poslovne banke, čime nije ispoštovao navedenu odredbu TD i onemogućio je ovaj ugovorni organ da izvrši potpunu provjeru činjeničnog stanja u pogledu njegove ekonomsko-finansijske sposobnosti;
- ponuđač “MAP-AUTO” d.o.o. GORAŽDE isključen je iz konkurencije zbog toga što u ponudi nije slovima upisan iznos cijene ponude, a kako je to bilo propisano tačkom 4.5 Tenderske dokumentacije;
- da ponuda ponuđača “APOLLO” d.o.o. GORAŽDE nije prihvatljiva jer u ponudi nije slovima upisan iznos cijene ponude, a kako je traženo tačkom 4.5 Tenderske dokumentacije, te je na par mjesta u obrascu za cijenu ponude izvršena ispravke na nedozvoljen način, odnosno bez potvrde potpisom i datumom izvršenja ispravke, a shodno tački 4.1 TD.

Kako u konkurenciji za dodjelu ugovora nije ostala nijedna prihvatljiva ponuda, primjenjen je član 69. stav (2) tačka d) Zakona o javnim nabavkama, koji propisuje da je ugovorni organ obavezan poništiti postupak javne nabavke u slučaju da nijedna od primljenih ponuda nije prihvatljiva.

U postupku donošenja ove odluke posebno su cijenjene činjenice da je Komisija pravilno i potpuno izvršila ocjenu kvalifikovanosti ponuđača, a u skladu sa kriterijima iz Tenderske dokumentacije.

Uzimajući u obzir naprijed navedeno, odlučeno je kao u dispozitivu ove Odluke.

POUKA O PRAVNOM LIJEKU:

Protiv ove Odluke može se uložiti žalba ugovornom organu u pisanoj formi, direktno, elektronskim putem ili preporučenom poštanskom pošiljkom, najkasnije u roku od 10 /deset/ dana od dana prijema ove Odluke.

V L A D A
BOSANSKO-PODRINJSKOG
KANTONA GORAŽDE

P R E M I J E R

Emir Oković

Broj:03 – 14 – 58 / 17
Goražde, 27.01.2017.godine